

Ina solemnitad ch'aulza sur quei da mintgadi

Perdanonza cun l'enconuscenta processiun a Lumbrein

DA GIUSEP CAPAUL / ANR

■ **Aura atunila da rara bellezza, in di plein sulegl, la contrada en vestgii bri-niu-verd ed in maieusts Pèz Terri, levamein ennevaus, han procurau per ina rama elevonta, dau la dretga tempra e giavinau neutier in grond pievel per far perdanonza ed admirar la biala processiun mintgamai la secunda dumengia d'october a Lumbrein.** La baselgia parochiala era fullanada ditg avon ch'il bien plevon, sur *Dirk Jasinski*, ha fatg cordial beinvegni als fideivels per l'ortiunda fiasta titulada dalla Confraternitad da Nossadunna dallas siat dolurs ed oz perdanonza. All'entschatta resuna era tradizionalme in la canzun «Sontga mumma dolorusa» che va tras siu miedi e cuntegn tschafont bein a prai cun l'intenziun dalla solemnitad.

Ina messa da Gounod

Il Chor mischedau Vrin/Surin procura cun la «Messe brève» da Charles Gounod (1818-1893), sut la direziun da *Pieder Alig*, cun accompagnament all'orgla tras *Marcel Soler* per edificont cant liturgic. Era las ulteriuras canzuns marianas en ba-

selgia e da processiun han plaschiu. Persuenter s'anda ton compliment sco engraziament.

El center dil priedi ha il plevon mess Nossadunna sco mumma da Däu, declarond quei a basa da texts biblics che dattan honur ad ella ed espriman sia grondezia. Maria ha accumpignau Cristus tochen tier la crusch per che quel sappi exequir sia ovra da spindrament. Nossadunna ei e resta ina pussenta intercessura e mereta gronda veneraziun.

La processiun sespleiga tenor il liung rodel sur la ruta usitada. Per che tut funcziuni procuran ils responsabels *Erika Capaul-Donau*, *Anton Capaul*, *Curtin Casalis* ed *Elmar Collenberg*. Els prestan gronda lavur cun mirar per cooperonts e cooperontas en grond diember e che tut sespleighi endretg e dignamein.

2020 – 300 onns perdanonza e processiun

Ordavon alla processiun va la s. crusch gronda. Gest sruenter suondan dus ministrants che portan la bulla. Quei ei il document, tschentaus ora e sutscrites ils 26 da november 1719 – pia avon 300 onns – dil superiar general diel uorden dils servits

Angelus Maria Vennura ch'ha lubiu d'introducir la Confraternitad da Nossadunna dallas siat dolurs a Lumbrein. La fundaziun formala e solemna da quella Confraternitad ha giu liag ils 21 da zercladur 1720. L'auter onn san ins pia festivar il giubileum da 300 onns perdanonza e processiun.

Sruenter la sontga crusch e bulla suondan musica e parada cun cooperonts e cooperontas en gruppas costumadas da buobas e giuvnas, las guardias, purtaders da sontgadads, vuts, sontgas cruschs (cafanuns) e baldachin cul celebrant e ministrants. En tut cumpeggia la processiun 35

parts involvidas. In aspect impressiunont se presenta surtut cu cooperonts, cooperontas ed il pievel fuorman in rudi el liug dalla fermada dalla processiun per la benedicziun silla piazza da sport sper la scola. In maletg unic era cun in magnific panorama.

Engraziu a tuts ch'han cooperau

Alla fin dil survetsch divin ha il plevon engraziu a quels ch'han cooperau: Chor mischedau Vrin/Surin, organist, Uniu da giuventetgna Lumbrein e parada, alla Societad da musica Lumbrein soo era a tut quels ch'han giu ina funcziun ella processiun. Senza lur engaschi – ed era cun agid da gliעד d'ordeifer – dess ei negina cuntinuaziun da quella digna tradiziun.

Tuts ein vegni envidai dalla plev sruenter messa e processiun ad in aperitiv sil plaz sur baselgia nua che la Societad da musica Lumbrein – sut direziun da *Gian Peider Casanova* – ha delectau cun zacontas bialas produenziuns. Tgei biala finiziun d'ina gronda festivitad nua che cardientscha, admiraziun, legria e placher han regiu vesivlamein ed udiblamain.



Buobas e giuvnas en costum (siat pintgas, otg grondas, las Treis Marias e lur accumpignadras).

FOTO D. DEPLANGES